

**BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
MINISTARSTVO ZDRAVSTVA
TUZLA**

Broj,13/1-33-016713/21
Tuzla, 25.10.2021.godine

Na osnovu člana 14. i člana 23. Zakona o ministarskim i drugim organima uprave Tuzlanskog kantona („Službene novine Tuzlanskog kantona“ broj 10/18 – prečišćeni tekst), člana 12. Zakona o apotekarskoj djelatnosti („Službene novine Federacije BiH“, broj 40/10) i člana 6. stav 1. Pravilnika o bližim uvjetima u pogledu prostora, opreme i kadra, kriterijima za osnivanje i obavljanje apotekarske djelatnosti u svim organizacionim oblicima, kao i načinu i postupku njihove verifikacije („Službene novine Federacije BiH“, broj: 44/12, 23/13, 27/14 i 36/19), Ministarstvo zdravstva donosi

ODLUKU

o određivanju slobodnih lokacija za osnivanje apoteka u Tuzlanskom kantonu u 2021. godini

I

Ovom Odlukom se određuju slobodne lokacije u Tuzlanskom kantonu na kojima se može osnovati apoteka u 2021. godini (u daljem tekstu: Odluka) u skladu sa članom 6. Pravilnika o bližim uvjetima u pogledu prostora, opreme i kadra, kriterijima za osnivanje i obavljanje apotekarske djelatnosti u svim organizacionim oblicima, kao i načinu i postupku njihove verifikacije („Službene novine Federacije BiH“, broj: 44/12, 23/13, 27/14 i 36/19) (u daljem tekstu: Pravilnik) i utvrđuju uslovi, postupak i kriteriji za dodjelu slobodnih lokacija u Tuzlanskom kantonu za osnivanje apoteka u 2021. godini.

II

Slobodne lokacije u smislu tačke I ove Odluke su određene u skladu sa demografskim i geografskim kriterijima iz člana 3. i 4. Pravilnika i zahtjeva Gradova/općina u Tuzlanskom kantonu, kao potreba lokalnih zajednica za apotekarskom službom i to:

1. Demografski i geografski kriteriji iz člana 3. i 4. Pravilnika:

1.1. **OPĆINA KLADANJ** – jedna lokacija
izuzev mjesnih zajednica Kladanj i Stupari

2. Potrebe - zahtjevi Gradova/općina za apotekarskom službom:

2.1. **GRAD TUZLA** - jedna lokacija

1. Mjesna zajednica Centar

2.2. **OPĆINA BANOVIĆI** – jedna lokacija

1. Mjesna zajednica Grad I

2.3. **GRAD ŽIVINICE** – dvije lokacije

1. Mjesna zajednica Kovači

2. Mjesna zajednica Centar, naselje Strašan

2.4. GRAD GRADAČAC – četiri lokacije

1. Mjesna zajednica Vida I
2. Mjesna zajednica Varoš
3. Mjesna zajednica Mionica 3
4. Mjesna zajednica Škorići i Požarike

2.5. OPĆINA SREBRENİK – jedna lokacija

1. Mjesna zajednica Bare, Babunovići i Luka.

2.6. OPĆINA KALESIJA – jedna lokacija

1. Mjesna zajednica Rainci Donji

III

Međusobna udaljenost između dvije apoteke ne može biti manja od 400 metara najbliže cestovne povezanosti.

Međusobna udaljenost apoteka iz stava 1. ove tačke utvrđuje se izmjerom ovlaštenog lica za obavljanje geodetskih poslova u skladu sa važećim propisima iz ove oblasti.

IV

Izraz apoteka u smislu Odluke smatra se apoteka zdravstvena ustanova, ogranak apoteke zdravstvene ustanove i apoteka privatna praksa.

V

Saglasnosti na lokacije za osnivanje apoteka dodjeljuju se za utvrđene slobodne lokacije u tački II.

VI

Uslove koje podnosilac zahtjeva mora ispunjavati su:

- a) da je magistar farmacije sa prebivalištem u Federaciji BiH.
- b) da je domaće ili strano pravno ili fizičko lice;
- c) da je apoteka zdravstvena ustanova sa registracijom upisana u sudski registar nadležnog suda u Federaciji BiH;

VII

Zahtjev se dostavlja Ministarstvu zdravstva Tuzlanskog kantona od prvog narednog dana od dana stupanja na snagu Odluke.

Rok za dostavljanje zahtjeva iz stava 1. ove tačke je 8 dana od dana stupanja na snagu Odluke.

VIII

Podnosilac zahtjeva može podnijeti zahtjev za saglasnost na samo jednu lokaciju utvrđenu Odlukom.

Uz zahtjev se prilaže:

- a) za tačku VI pod a) diplomu magistra farmacije i obrazac PBA 3-prebivalište,
- b) za tačku VI pod b) izvod iz registra ili ovjerenu kopiju lične karte;

c) za tačku VI pod c) izvod iz sudskog registra nadležnog suda u Federaciji BiH;

IX

Pored dokaza iz tačke VIII Odluke, podnosioci zahtjeva mogu priložiti i druge dokaze iz tačke X Odluke.

X

Ukoliko dva ili više podnosilaca zahtjeva iz tačke VI Odluke, apliciraju za davanje saglasnosti na istu lokaciju, prilikom odlučivanja za dodjelu saglasnosti na lokaciju uzimaju se u obzir, po redu prioriteta, sljedeći kriteriji:

1. Ukoliko je podnositelj zahtjeva magistar farmacije sa licencom od nadležne komore, a koji se u trenutku donošenja Odluke nalazio na evidenciji Službe za zapošljavanje Tuzlanskog kantona (dokaz: diploma, licenca i uvjerenje od Službe za zapošljavanje);
2. Posjedovanje Ugovora sa lokalnom zajednicom o zakupu prostora koji je u vlasništvu lokalne zajednice (grada, općine ili mjesne zajednice), a koji površinom zadovoljava uslov prostora iz Pravilnika, minimalno za ogranak – privatnu praksu (dokaz: ugovor o zakupu)
3. Vlasništvo ili zakup poslovnog prostora u kojem se planira otvoriti apoteka, a koji površinom zadovoljava uslov prostora iz Pravilnika, minimalno za ogranak – privatnu praksu (dokaz: ZK izvadak, ugovor o kupoprodaji poslovnog prostora ili drugi dokaz o vlasništvu).
4. U cilju poticanja razvoja poduzetništva, slobodnog razvoja konkurencije na tržištu, dati prednost zahtjevu fizičkog lica koje nije osnivač bilo kojeg pravnog lica ili apoteke u bilo kojem organizacionom obliku na teritoriji BiH na dan donošenja Odluke (dokaz: ovjerena izjava);
5. Ukoliko aplicira više apoteka zdravstvenih ustanova, a u cilju sprečavanja razvoja nelojalne konkurencije, dati prednost apoteci zdravstvenoj ustanovi koja ima manji broj organizacionih jedinica u svom sastavu na području FBiH; (dokaz: rješenja kantonalnih ministarstava o organizovanju organizacionih jedinica sa područja Federacije BiH);
6. Ukoliko aplicira više pravnih lica, dati prednost pravnom licu koje nema upisanu nijednu poslovnu jedinicu.
7. Ukoliko svi navedeni kriteriji budu izjednačeni, saglasnost na lokaciju za osnivanje apoteka dodjeljuje se podnosiocu zahtjeva koji se prvi prijavio na slobodnu lokaciju.

Svi dokazi se prilažu u originalu ili ovjerenoj kopiji.

XI

Nezaposleno lice koje je na evidenciji Službe za zapošljavanje Tuzlanskog kantona, pri jednakim uslovima i jednakom broju bodova, ima prioritet pri dodjeli lokacije sljedećim redosljedom:

- a) član porodice šehida, poginulog, umrlog i nestalog branioca,
- b) ratni vojni invalid,
- c) dobitnik ratnog priznanja i odlikovanja,
- d) demobilisani branilac,
- e) članovi porodice ratnog vojnog invalida, dobitnika ratnog priznanja i odlikovanja i demobilisanog branioca.

Pravo iz stava 1. ove tačke ne može ostvariti lice, kojem je radni odnos, zasnovan po osnovu ranije ostvarenog prioriteta pri zapošljavanju, prestao njegovom krivicom ili je po prestanku radnog odnosa osvario pravo na otpremninu, odnosno koje je korisnik prava na porodičnu penziju.

Da bi ostvario prioritet na lokaciju, lice iz stava 1 ove tačke, koje ispunjava uslove za ostvarivanje tog prava, dužno je uz zahtjev priložiti sve dokaze o ispunjavanju traženih uslova, kao i potvrdu nadležnog organa o priznatom statusu iz stav 1. ove tačke pod a), b), c), d) ili e).

XII

Osnivač buduće apoteke, odnosno budući nositelj odobrenja za privatnu praksu kojem je izdata saglasnost na lokaciju dužan je podnijeti zahtjev za osnivanje apoteke sa potpunom dokumentacijom, shodno Pravilniku najkasnije do 31.01.2022.godine, u suprotnom se predmetna saglasnost stavlja van snage, a ista se izdaje slijedećem podnosiocu zahtjeva, odnosno budućem nositelju odobrenja, vodeći računa da se može izdati samo jedna prethodna saglasnost na lokaciju budućem nositelju odobrenja odnosno budućem osnivaču apoteke na utvrđenoj lokaciji.

XIII

Ova Odluka stupa na snagu narednog dana od dana objavljivanja u „Službenim novinama Tuzlanskog kantona“ i objavit će se na web stranici Vlade Tuzlanskog kantona - Ministarstvo zdravstva.

MINISTAR

Dostavljeno:
1x Evidencija
1x a/a

dr. med. Božo Jurić

